



27 JUN 2016

### **Program Pandu Puteri Mesra Komuniti Semarak Ramadhan 2016**

Kangar, 25 Jun : Seramai 31 orang ahli Pandu Puteri Siswi Semester 5 Diploma mengikuti program Pandu Puteri Mesra Komuniti Semarak Ramadhan 2016 di sekitar bandar Kangar, di sini, hari ini.

Jurulatih Pandu Puteri Pusat Ko-Kurikulum UniMAP, Nor Azurawati Ahmad Zuhdi berkata, program ini menumpukan kepada Khidmat Komuniti Setempat iaitu sumbangan ikhlas 100 bungkusan berbuka puasa kepada badan-badan Perkhidmatan Awam hasil kutipan daripada para pelajar sendiri.

“Para peserta diberikan pendedahan bahawa khidmat komuniti tidak semestinya terhad kepada program rasmi yang memerlukan kertas kerja dan kos yang tinggi.

“Justeru, peserta dibawa mendekati pihak Polis DiRaja Malaysia, Jabatan Bomba dan Penyelamat dan Kementerian Kesihatan iaitu Balai Polis Beseri, Jabatan Bomba dan Penyelamat Kangar, Balai Polis Trafik Kangar dan Unit Kecemasan Hospital Tuanku Fauziah(HTF),” katanya dalam sebuah kenyataan di sini.

Menurutnya, program ini mendapat reaksi positif daripada pihak perkhidmatan awam yang dilawati apabila mendapat sambutan mesra dari mereka sekaligus menyemarakkan semangat para peserta program.

“Secara tidak langsung keadaan ini dapat memantapkan salah satu elemen di dalam silibus ko-kurikulum Pandu Puteri iaitu mempraktikkan amalan undang-undang Pandu Puteri ketika berurusan dengan pihak yang berkenaan.

Selain itu, program ini berjaya mendedahkan para peserta tentang konsep khidmat komuniti yang sebenar dan diharapkan penganjuran program seperti ini dapat diadakan lagi pada masa hadapan,” katanya.

Program Pandu Puteri Mesra Komuniti Semarak Ramadhan 2016 bermula jam 2.30 petang dari kampus UniCiti Alam Sungai Chuchuh itu memberi

sumbangan makanan ringan sebagai juadah berbuka puasa kepada petugas perkhidmatan awam yang bertugas.

**Dikeluarkan Oleh :**

**Aininulniza Mohd Yusof ([aininulniza@unimap.edu.my](mailto:aininulniza@unimap.edu.my))**

Penolong Pegawai Perhubungan Media UniMAP